

Powšitkowne WOZJEWJENJA

njedźelu, 12. meje 2013

Canki, somot, parlički

Wosebita wustajeńca na temu „Canki, somot, parlički – Pycha narodneje drasty Serbow“ wotewrje so tutu njedźelu, 12. meje, w 15 hodź. w Budyskim Serbskim muzeju. We wustajeńcy předstaja so najrjeńše drastowe džele jako drohoćinki ludoweho wuměstwa. Wone su pisane, bohate na wariantach a wumělsce dokonjane.

Joachim Jauer porěči wo přewrótowym času

Něhdyši korespondent sćelaka ZDF w NDR a we wuchodnej Europje Joachim Jauer budže srjedu, 15. meje, w 19.00 hodź. w Budyskim serbskim gymnaziju přednošować. Wón porěči wo podźělu křesćanow na politiskim přewróće. Na přednošk su wšitcy zajimcy wutrobnje přeprošeni. Wopyt Joachima Jauera běše hižo w měrcu planowany. Njezapkeho sněha dla njemóžeše pak dojeć.

Putniske kemše z biskopom

Na lětuše wulke serbske putnikowanje swjatki pónđzelu, 20. meje, přijědže nowy Drježdžansko-Mišnjanski biskop dr. Heiner Koch. Boža mša, kotruž Radworska wosada wuhotuje, započnje so w 9 hodź. na putniskej łuce.

Ministrantska kopańca

Tradicionalny koparski turněr serbskich ministrantow budže swjatkownu wutoru, 21. meje, w Pěskcach. Započatk je w 9.00 hodź. z Božej mšu we wjesnej kapałce. Za Božu mšu je Wosadnik trěbny. Přizjewjenja přijimuja so hač do wutory, 14. meje, we Worklecach.

Putnikowanje młodžiny biskopstwa

Putnikowanje młodžiny Drježdžansko-Mišnjanskeho biskopstwa zahaji so sobotu, 25. meje, w 14.30 hodź. w klóštrje Marijinej Hwězdze. Nazajtra, njedźelu, 26. meje, w 11.00 hodź. je putniska Boža mša w hnadownej cyrkwi w Róžeńće, kotruž wosweći biskop Heiner Koch. Dalše informacije k putnikowanju su w interneće pod www.kathjusa.de wozjewjene.

Swójbne popođnjo na Kukowskim hrodźišću

Dekanatne dušepastyrstwo přeprošuje njedźelu, 9. junija, na swójbne popođnjo na Kukowske hrodźišće. Započatk je w 14.30 hodź. z nyšporom.

Putnikowanje do Krupki

Na pěše putnikowanje do Krupki su młodostni ze wšěch wosadow tež lětsa zaso přeprošeni. Procesion woteńdže njedźelu, 28. julija, z Chróscic a wróci so pjatk, 2. awgusta. Zajimcy měli so w Chróscicach na farje přizjewić, telefonowe čisło (03 57 96) 8 04 00. Boža mša w Krupce budže srjedu, 31. julija, w 10 hodź.